

Stipendiatinik tallimanik naalakkersuisut ukiut tamaasa Aningaasanut Inatsit aqutigalugu ilisimatuussutsikkut misissuinernut qinnutigineqarsinnaasunik atugassanik kiisalu Kalaallit Nunaanni namminerisamik ilisimatuussutsikkut siunnersuisoqatigiinnik peqalernissamik siunnersuummik saqqummiussaqaarnissaannik inatsisartunit peqqunegaarnissaannik siunnersuut.

(Inatsisartunut ilaasortaq Juliane Henningsen, Inuit Ataqatigiit)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Juliane Henningsenip Stipendiatinik tallimanik naalakkersuisut ukiut tamaasa Aningaasanut Inatsit aqutigalugu ilisimatuussutsikkut misissuinernut qinnutigineqarsinnaasunik atugassanik kiisalu Kalaallit Nunaanni namminerisamik ilisimatuussutsikkut siunnersuisoqatigiinnik peqalernissamik siunnersuuteqarneranut Naalakkersuisut qujapput.

Ilisimatusarneq ilisimatusarnermillu ilinniartitaaneq Naalakkersuisunit pingaartinneqartuupput Nunatsinnilu silaannaap allanngoriartorneranut takusatsinnut attuumassuteqarluinnarlutik. Taamaattumik nunatsinni ilisimatusarnermik ilinniarsimallutik kandidatiusut amerlisiinneqarnissaat sulissutigaarput.

Ilumoorpoq avitseqatigiilluni aningaasalersorneqartunik PhD-mut ilisimatusarnissamut atugassanik pingasunik stipendiaqarmat ukiumut nunatsinneersunit qinnuteqaatigineqarsinnaasunik. Stipendiatinik agguaanermi ilinniartup Nunatsinni suliatiqut avatangiisinut attaveqartuunissaa qinnuteqartullu nunatsinni inuiaqatigiinnut taamatut attaveqarnermik uppernaarsaasinaasissaa pingaartinneqartarpoq. Taamaaliornikkut stipendiat Ph.d-rnerlu aqutigalugit ilisimasanik piginnaasanillu Nunatsinni nunatsinnullu nuussisoqarnissaa qularnaarneqartarpoq.

Stipendiatinik taakkuninnga toqqaaneq Kommission for Videnskabelige Undersøgelser i Grønland danskit kalaallillu ilisimatusarneq pillugu suleqatigiinnerannut tunngasut pillugit danskit ilisimatusarnermut ministeriannut nunatsinnilu ilisimatusarnermut Naalakkersuisumut siunnersuisarfusoq aqutigalugu pisarpoq.

Ph.d stipendiatit avitseqatigiilluni aningaasalersorneqartut pingasut taakku saniatiqut Inuussutissarsiornermut Ph.d-nngorniarnit marluk 2008-mi aallartinneqarput. Tamanna Grønlands Bankip Inuussutissarsiornermut aningaasaateqarfiata, Namminersorlutik Oqartussat suliffeqarfiullu peqataasup akornanni suleqatigiinnikkut pivoq. Naalakkersuisut Inuussutissarsiornermut Ph.d-nik ukiut tamaasa aallartitsisoqarsinnaanngorlugu aningaasanik immikkoortitsisareerput Grønlands Bankillu Inuussutissarsiornermut aningaasaateqarfiata saniatiqut suleqatissanik allanik nassaarnissaq sulissutigineqarpoq. Ph.d-nngorniartup ilinniarnermi nalaani ilisimatusarfimmut nunatsinnilu suliffeqarfimmut atassuteqarnissaa iluaqutaassaaq, tassami ilinniartup ilisimasai suliffeqarfimmut taamatullu nunatsinni inuiaqatigiinnut iluaqutaalipallassammata.

Kalaallit ilinniartut ilisimatusarnermik ilinniagaqarusuttut naammassinnissinnaasullu aamma stipendiaqarnissamut periarfissaqarnissaat Naalakkersuisunit sulissutigineqarpoq taamaattumillu maanna stipendiaareersut saniatigut ilisimatusarnermik ilinniartitaanermut stipendianik amerlanerusunik pilersitsinissamut aningaasassarsioqqinnermik sulissuteqartoqalereerpoq. Tamatumunnga atatillugu oqaatigineqarsinnaavoq ukiuni pingasuni Ph.d stipendia ataaseq 3.000.000 kr.-it missaannik akeqartarmat.

Ilisimatusarnermik ilinniartitaanermut stipendiat nunatsinni ilinniarfinnut atugassat aamma atorlugit ilisimatusarnermi avatangiisit pitsanngorsarneqassapput ilisimatusarnermillu ilinniartitaanermi siunnersuinerup ilisarimasasaqalernerullu nukittorsarneqarnissaat pingaaruteqarluinnarpoq, taakku Ilisimatusarfimmi ilisimatusarnermilluunniit ilinniarfinni allani pineri apeqqutaatinnagit. Stipendiat amerlanerunerisigut iluaqutissaq alla aamma tassaassaaq ilinniarfinnit siunnersortit siunnersuinermik qinnuteqaasiornermillu misilittagaqarnerulernissaat kingusinnerusukkut ilisimatusarnermi avatangiisit annertusarneqarnissaannut pitsaasuusinnaasoq peqataaffiusinnaasorlu.

Ilisimatusarnermi politikikkut nassuiaatissamik periusissamillu suliarinninnermut atatillugu Nunatsinni ilisimatusarneq pillugu siunnersuisoqatigiinnik pilersitsinissap kaammattuutiginerqarnissaa Naalakkersuisut naatsorsuutigaa. Tamatuma saniatigut ilisimatusarnermi politikikkut nassuiaammi Ph.d stipendiat amerlanerunissaat pisariaqartinneqarnersoq, ilinniartut qassit pilerilersinneqarsinnaanersut, kiisalu ilisimatusarnermik ilinniartitaanermut aningaasaleruinerup iluaqutissartai naliliiffigineqassapput. Nassuiaatip Inatsisartut 2010-mi ukiakkut ataatsimiinneranni saqqummiunneqarnissaa pilersaarutaavoq tasanilu inassuteqaatit 2011-mut siumullu Aningaasanut Inatsisissatut Siunnersuusiornermut atatillugu tulleriarinnermi ilaatinneqassapput. Nassuiaat nunatsinni ilisimatusarfeqarfiit isumasioqatigalugit suliarineqassaaq.

Taamaattumik Inuussutissarsiornermut Ph.d stipendianik pilersitsinikkut Naalakkersuisut ukiumut avitseqatigiilluni KVUG-stipendiat pingasut taakku saniatigut ilisimatusarnermik ilinniartitaanermut stipendianik amerlanerusunik pilersitsereerput. Tamatuma saniatigut stipendianik amerlanerusunik pisariaqartitsisoqarnersoq Ilisimatusarnermi politikikkut nassuiaatissami periusissamilu qulaajarneqassaaq. Suliniutit taakku aallartinneqareermata siunnersuutip akuerineqannginnissaa inassutigineqarpoq.